


四庫全書

集部

2834  
49



# 欽定四庫全書

集部  
讀書後卷二

詳校官監察御史<sub>臣</sub>徐如澍

侍讀<sub>臣</sub>孫球覆勘

總校官原任中允<sub>臣</sub>王燕緒

校對官典簿<sub>臣</sub>劉景岳

謄錄監生<sub>臣</sub>何銓

欽定四庫全書

集部六

讀書後

別集類五

明

提要

臣等謹案讀書後八卷明王世貞撰世貞有四部稿別著錄此書初止四卷為世貞四部稿及續稿所未載遂至散佚其姪士騏得殘本于賣錫者乃錄而刊之名曰附集後吳江許恭又採四部稿中書後之文為一卷續稿

中讀佛經之文為一卷讀道經之文為二卷  
併為八卷重刊之而陳繼儒為之序周亮工  
書影記世貞初不喜蘇文晚乃嗜之臨沒之  
時牀頭尚有蘇文一部今觀是編往往與蘇  
軾辨難而其文反覆條暢亦皆類軾無復摹  
秦仿漢之習其跋李東陽樂府與歸有光集  
心平氣和亦與其生平持論不同世貞嘗為  
有光像贊曰風行水上渙為文章風定波息

與水相忘千載惟公繼韓歐陽余豈異趨久而自傷其深自悔責與此書合然則此書為晚年進境以少許勝多多矣其第五卷為四部稿中題跋二十五篇其中如讀亢倉子不知為王士元作則未考孟浩然集序讀三墳以為劉炫作則未考隋書經籍志讀元命苞一篇所言皆衛嵩之元苞尤為荒謬則猶早年盛氣不及檢校之作也是編雖雜論古書

而究為雜著非目錄之比無類可附姑仍著錄於集部焉乾隆四十三年三月恭校上

總纂官臣紀昀臣陸錫熊臣孫士毅

總校官臣陸費墀

讀書後原序

讀書後者王元美先生晚年所撰四部稿續稿所未載也初刻續稿時其間多所放失偶有賣餉者束殘書置擔頭取視之則先生詩文數卷及讀書後在焉王岡伯得之驚喜刻曰附集藏于家海內學士大夫不能數數見也許仲謙曰此弇州生平極得意之作但恨繕寫多訛甚則有數行後先顛倒舛錯者一日得王閑仲校正善本仲謙喜躍請以孤行之人間而因拈前四部中讀

書後附馬陳子曰先生批駁釋道兩藏尤奇瑋宏博此獨非書後類乎仲謙乃與予重加叅訂共得若干卷而先生之碎壁殘璣收拾無遺矣初先生遭家諱後日與敬美次公讀書萬卷樓如所謂士衡住東頭士龍住西頭者已召起敬歷中外納鄖節遠近贊文徵文者無虛歲賓客觴詠無虛晷猶時時手一編見之論著至于戢身靖廬擔掃筆研而翻閱兩藏經矻矻丹鉛之故也先生慧眼辨才與妙觀察智皆事事第一且栽培之以國



憲家猷熏染之以交遊聞見積習之以新陳歲月試取少年晚年讀書後互味之覺遲時跌宕縱橫標新領異如織錦而問天孫食肉而問禁鬻雖眩目爽口或出于偏師取勝者有之至是霜降水落鑑空衡平奏刀必中觚發矢必中的抓搔必中痛癢斷案一新精彩萬變非筆隨人老益識隨人老也先生嘗謂余詩文關鍵出一字如獄吏平反置一語如兵家律令推而至于讀書法亦然若書生輕於立論論議馳騁大放厥辭嘗有驟發

之數十年前而慚悔于數十年後者即欲追取更竄一  
兩字迄不可得夫未能使自己解頤而乃欲使古人唯  
唯心服無是理也宋尤延之手錄古書即子弟諸女亦  
令抄寫視中祕且過之而不皆傳濡須秦氏為金部員  
外郎奏請田宅文籍不許子孫分割而竟不知零落何  
所今先生論著大約如呂氏讀書記及晁氏讀書志每  
終篇標其大指以備遺忘而先生精確過之其牙籤萬  
軸雖未必一一無恙而糟粕去神髓存則身後書籍之

若存若亡奚足道哉閑仲為先生小阮校閱精確最得  
真傳仲謙太常次公孫壻也尤嫻於瑯琊王氏一家言  
謂四部若大海水而讀書後則又海中之貝闕珠宮也  
卷帙不苦浩繁而學者得未曾有即以此孤行人間足  
矣雲間陳繼儒仲醇序

欽定四庫全書

原序

欽定四庫全書

讀書後卷一

明 王世貞 撰

讀莊子一

余讀莊子而歎曰嗟乎世固未有尊老子如莊子者也  
夫尊孔子者莫若孟子而孟子之尊孔子不過曰孔子  
聖之時又曰吾所願則學孔子而已其談仁義辨王伯  
探性善推不忍往往發揮所自得之蘊以成其書固未

嘗舉孔子之文言而訓詁之也莊子之所撰著雖極而  
至於尊天而無懷葛天之治其究必宿於老子之謂無  
名無欲無為無言以至無始之旨挫銳守雌和光同塵  
絕聖智以應天下之法致柔守中抱一含齷食母有精  
有信虛極靜篤以保一身之要與他所掊擊失道失德  
失仁失義之弊聖智之當絕棄展轉反覆亡所不援引  
或曲而暢之或旁而通之且詠言之嗟歎之必使老子  
之道高出於堯舜之上其遺言下視乎六經而後已嗟

乎莊子之尊老子不亦至乎抑不特尊之而已也而且老子之忠臣夫忠臣者揚主之善而諱其短凡老子之所稱張與奪枉曲直騁堅用奇取大取小得志於天下之故稍近術而為人所窺者則已逆料宋儒之見攻而闕之彼且以為真闕之也而其辭之剽攘弔詭身先陷於不韙矣夫書不可以多著也多著而至於十餘萬言而其旨不過數百言而已是以雜而不可竟複而使入厭書不可以有意作也以有意而作之是以誕而不

可信狂而使人怒嗟乎何莊子之忠於老子而不自忠也

讀莊子二

太史公曰莊子蒙人也與梁惠王齊宣王同時其學無不窺然要其本歸於老氏其著書十餘萬言大抵率寓言作漁父盜蹠以詆訾孔子之徒以明老子之術蘇軾記其祠而謂為得老子之麤者莊子蓋助老子特不可為法而引楚公子操箠之僕隸其主而出之以為愛公



子而不知事公子之法凡莊子之言皆實予而文不予陽擠而陰助之其正言蓋無幾至於訾詆孔子未嘗不微見其意其論天下道術自墨翟禽滑釐彭蒙慎到闕尹老聃之徒以至其身皆以為一家而孔子不與其尊之也至矣余謂太史公非識莊子之麤者軾乃識莊子之麤而巧為之蔽者也當老子之時見天下之俗日趣於薄以至詐力相矯思太古之朴一見焉而不可得謂仁義之名實啟之則不得不惡其名而歸咎於文武夫

既歸咎於文武而追其自則謂堯舜之不能造極於無為而以有為啓之則不得不致歎於堯舜夫堯舜而至流於周之末若有如老子所云者不知聖人不能為俗能因俗而裁成之而已不然以老子之知之即無位而不使東周之郭十里之巷若畏壘而日就纖穠以有儀秦也莊子又後百年而生者也彼見夫仁義之日偽而詐力之日深且其身僂焉而苦禮樂之拘繫我謂孔子實言之而其門人實廣之且天下皆以為聖人彼又懼

夫老子之教日不勝故於聖人之外立所謂至人以尊  
老子又往往寓之一卮語於孔子而必持老子之說以  
駕其表然又窺見孔子之真為聖而不可奪故間以一  
二格言寓之意若曰孔子之未見老子一格也其得見  
老子而受砭焉又一格也大意在尊老子而抑孔子既  
抑之而又收之使為老子徒彼夫語道術而不列孔子  
所謂鄒魯之儒非耶且何以見尊至軾所欲去讓王說  
劍漁父盜蹠四篇而以列禦寇之齊續於陽子西游而

為一章則甚當雖然無救於所謂詆訾孔子也

讀莊子三

蘇氏之欲去讓王說劍盜蹠漁父四章而以列子前後之續也無所據特以盜蹠漁父之排孔子甚而欲去之夫內外雜篇何嘗不排孔子也其排婉而深不若盜蹠漁父之直而淺也然而吾於蘇氏取焉所以取者何以莊子之文得之也凡莊子之為文宏放馳逐縱而不可羈其辭高妙而有深味然託名多怪詭而轉句或晦棘

而難解其下字或奧僻而不可識今是四章獨讓王猶近之而太疑於正而是三章者故甚顯暢而膚淺其法類若禮經之所謂樂記儒行者意必莊子之徒托而為之者也韓愈作讀墨而謂子夏之後流而為莊亦無所據而王安石引之吾以為不必自子夏氏若莊子者蓋嘗受業於孔子之門而有得者也何以知其然也凡莊子之所談如君臣父子之大戒天機嗜欲之深淺六經之用聖人之論議皆精切而爾雅即田子方荀卿之所

不能及特不若其治老子之深蓋游於吾聖教而中畔  
之者也太史公謂申韓之學出於老子故與之同傳唐  
人祖老子而離之吾以太史公信也夫所謂學不必其  
盡學也得一語而守之曰嗇曰儉曰國之利器不可以  
示人曰將欲取之必故與之此申韓氏之所貴也若莊子  
則無是也太史公又謂莊子梁惠王齊宣王時人審爾  
奈何不使與孟子見而一相究詰也莊子非告子夷之  
比也其闢必若涿鹿彭城之戰天地為之蕩而不寧日

月為之晦而不辨夫莊子敗則逃之無何有之鄉而已  
然而不怒也孟子不敗也敗則怒

讀莊子讓王篇

讓王一篇或以為漁父盜蹠說劍皆非莊先生所作而  
讀其辭則若差暢而近古於道亦不至悖第中所稱堯  
讓天下於許由許由不受又讓於子州支父而亦不受  
支父疑即巢父也舜讓天下於子州支伯而亦不受支  
伯疑支父子也夫是三君子者不以天下易吾生者也

舜又讓天下於善卷而亦不受此不以吾身殉天下者也又讓天下於石戶之農而不受此以舜之德為未至者也皆入深山蹈滄海而絕其跡者也湯克桀以讓卞隨卞隨沈桐水而死讓瞽瞍瞽瞍沈廬水而死則何言哉夫所貴於不為天下者為生也所以能近道者為削名也為名而自殘其身則不智居潔而顯揚其汙則不仁許由巢父事多傳之者或不妄其他或莊先生之寓言或他人瓌言之而莊先生為記之要之不足道特惜



夫莊先生之自持論而自相悖者也彼卞隨瞽光者巢許五君子之罪人也而又何言也

讀列子

吾始好列子文謂其與莊子同敘事而獨簡勁有力以爲差勝之于鱗亦以爲然而柳子厚故謂列子辭尤質厚少譌作最後稍熟莊子始知列子之不如莊子遠甚凡列子之談理引喻皆明淺僅得其虛泊無爲以幻破闕於膚膜之間而莊子則往往深入而探得其髓其

出世處世之精妙有超於揣摩意見之表者至其措句  
琢字出鬼入神固非列子之所敢望也吾意列子非全  
文其文當缺而後有附會之者凡莊子之所引微散漫  
而列子之所引則簡勁疑附會之者因莊子之文而加  
刪琢者也柳柳州列子辨獨舉劉向所稱為鄭穆公時  
人以穆公在孔子前百餘歲而歷舉列子在繻公時與  
其相駙子陽證其非夫列子引孔子不一而足是可知  
已又何必別引子陽以為證且向寧不自知其非鄭穆

公穆之一字當由傳錄者訛柳州之辨其所不必辨尤可笑也

讀墨子

墨子戰國一賢士大夫也孟子闢之以為惑世誣民若不可一日容於堯舜之世者而後世如韓昌黎輩尚尊之以與孔子並稱而上媿於神愚以為皆過也今讀其書大抵皆平治天下國家之道不甚悖於理如所謂入國必擇務而後從事國家昏亂則語之以尚賢尚同國

家貧則語之節用節葬國家憐音湛涵則語之非樂非  
命國家淫僻無禮則語之尊天事鬼國家務奪侵凌則  
語之無愛然則墨子之言以救世主之藥石耳非欲執  
而為世主之準也獨所謂棺三寸足以朽骨衣三領足  
以朽肉掘地之深下無菹漏哭往哭來及從事乎衣食  
若以為薄而無當者然此亦中產之下之常至今獨不  
能改而探墨子之旨大槩激於一時王公大人之為葬  
埋謂必大棺中棺革闌三操璧玉即具戈劒鼎鼓壺濫

文繡素練大鞅萬領輿馬女樂皆具必捶殄通壟輟民  
之事廢民之財如此而矯之以薄亦何不可且夫驪山  
之藏不三載而焚掘殆盡即漢唐宋以還諸陵寢亡不  
發者王公大臣貴家亡得完骨者厚葬之為失不唯損  
天下之有用以歸無用戕天下之有知以供無知其究  
至於暴其親之蛻以委草莽餒鳶犬而橫開天下椎埋  
劫殺之竅其罪加於薄葬者何啻萬萬倍顧不之訾而  
徒墨子之訾何也且夫墨子之道行則世主必不能安

宮室之侈與聲音采色狗馬田獵之奉卿大夫必不能  
安趙孟韓魏之富而說客游士必不能安華陽碣石之  
居與後車數十乘從者數百人其辭而闕之者蓋不止  
一孟子也吾故曰微孟子墨子固不能久且大也然而  
所謂塞路者何也貧乏失職之徒假其說以干世主用  
之則貴且顯即不用而可以希冀賢豪富饒之句施一  
廛一畝足以終其身而已此非墨子意也為墨子之徒  
而私之者意也

讀尹文子

尹文子非偽書其言刑名者真能言刑名家者也所謂  
智巧皆當與衆共之獨行之賢不足以成化獨能之事  
不足以周務出羣之辨不可為戶說絕衆之勇不可以  
征陣是以聖人任道以夷其險立法以理其差使賢愚  
不相棄能鄙不相遺能鄙不相遺則能鄙齊功賢愚不  
相棄則賢愚等慮此名語也他所証多諸家書頗覈而  
不倍道故存之

讀孔叢子

孔叢子吾夫子之世家垂也徵獻而文亦寓焉自子思以後世世為諸侯師然而不能為其國救敗辱焉無它諸侯者能以禮夫子之禮禮其後而不能以闕夫子之道用夫子之後之言故也子順所謀筴皆不悖於理而最後欲令魏陰媚嫪毐以圖苟全則大謬鮒之就陳涉也以復焚書坑儒讐也即死難何累哉獨敘世一章謂璠子黃厥德不脩失侯爵大司徒光分所食邑三百戶



請封黃弟茂為關內侯茂子子國子國生子印子印生  
弘農守仲驩仲驩子立與劉歆友善歆故光同時人小  
可二十年耳是立與六世大父行友也立子元元子建  
仕王莽為建戎大尹亦似太速疑必有脫誤

讀劉子

劉晝孔昭所作五十五篇其詞雖骯骯爽健而不悖理  
道識是非有布帛菽粟之致清神防欲知情謫光諸篇  
苦李蒙莊之藩隱然若窺見者當六季之末而不墮月

露煙華亦足貴矣鄙名以後小露學問無關本真茲則多生之餘習矣

讀子華子

子華子十卷自孔子遇諸剡而贈之以束帛於是著焉劉向序其辭以為趙簡子奉纁幣聘之爵執圭而殺竇鳴犢舜華子華子逡巡弗應簡子大怒將脅之以兵子華子去而之齊齊景公不能用也館於晏氏簡子卒而歸晉時已老矣遂不復仕以卒余得而讀之陽城胥渠章

頗言陰陽之理亦有大致語而風輪水樞之說亦微近  
穿鑿其辨黃帝鼎成升遐事甚詳然似是公孫卿以後  
語駁郊子禮亦正然似是左氏以後語辭趙簡子聘章  
則摹檀左文也晏子之事景公也不治阿且其言阿則  
烹與封之說也謂仲尼天也又曰轍跡病矣則門弟子  
之說也大道章頗言身中之造化時時及養生北宮意  
章則及醫矣是岐黃之說也凡子華子所言理在春秋  
時最近而文則廣有所剽擬誦之可也采而益我可也

然不可以為真子華子

讀楚語論

屈到嗜芰有疾召其宗老而屬之曰祭我必以芰及祥  
宗老將薦芰屈建命去之君子曰不違而道柳宗元非  
之曰禮有齋之日思其所樂思其所嗜子木去芰安得  
為道蘇子復非之曰甚矣柳子之陋也赫赫楚國若敖  
氏之賢聞於諸侯身為正卿死不在民而口腹是憂陋  
亦甚矣使子木行之國人誦之太史書之天下後世不

知夫子之賢而唯陋是聞子木其忍為此乎余則曰甚矣屈建之忍也而蘇子之好異也今夫取禮之輕者與食之重者比奚啻食重然則禮而輕也當其身尚不以廢食而況於其親乎哉從治命不從亂命恒也屈到之命薦芟亂也否也且夫芟與蔬藪等耳非若邕之痴長孺之爪甲腥穢而不可登席又非若銅雀之伎之淫侈也臨穴之殉之酷也宗老言之建頷之撤一蔬可以易盆一豆不為多國人何所誦太史何所書而天下後世

何所知乎今以建之卻之又不能為之諱而國人之媚  
新令尹者以為不違道而書之太史傳之天下後世是  
揚先人之過者建之卻也不在薦也夫不忍於一薦之  
小禮而棄忘其父之嗜好其不孝小也急於揚己之名  
而不諱其父之誤其不孝大也夫建也挾左右廣之甲  
而欲無禮於盟主之上卿棄諸侯之信而不之顧此夷  
狄也而何有於小禮也其父生不得志於鼎俎而又銜  
建之驚桀故示微於宗老而建卒弁髦之寧不違道也

或云屈到之芟建可薦也建之不薦左氏可無稱也左氏之稱柳子可無非也柳子之非蘇子可無譏也蘇子之譏子可無衷也甚矣儒者之好持論也余無以對

書趙世家公孫杵臼程嬰事後

程嬰既已脫趙孤而謂公孫杵臼曰今一索之不得後必且復索之公孫杵臼曰立孤與死孰難程嬰曰死易立孤難杵臼曰趙氏先君遇子厚子強為其難者吾為易者請先死云云其後韓厥說景公與程嬰謀而劫諸

將僂屠岸賈滅其族復與趙武田宅如故趙武既冠為成人程嬰乃自殺以報宣孟與公孫杵臼或曰嬰可以無死死過也予則以為不然凡嬰之所為存孤者誠難而杵臼死誠易然天下之所覩者生死也所不覩者難易也自趙孤之未立而嬰所以生者為趙孤也嬰故未嘗一日忘死也趙孤立而嬰生則食趙氏之報嬰能無死也杵臼死而以生授嬰嬰生而以死還杵臼夫豈直義至盡哉盖有餘仁矣雖然岸賈亦烏可非也盾以不



能討賊失之終然其始事可亮也岸賈以不能匡雪失之始然其終事可取也盾既為法受惡而未有能表岸賈者也

書伍子胥傳後

伍子胥勇烈徇志丈夫也謂之盡孔子之道則不可謂之悖孔子之道亦不可孔子之事魯也幾微不合輒去之又曰父母之讐不共戴天不合而去有新君在矣不以事新君為二心也孟子之言君之視臣如草芥則臣

視君如寇讐孟子過矣草芥其親寇讐之可也草芥其身寇讐之不可也平王淫太子之婦而欲廢太子推攸以僂其太子之傅而併及其兄即商受何啻焉受不僂文王不僂太公父也何以斬燼餘之頭而懸太白鞭屍非過也情也亦理也吳王僚信子胥之言謀伐楚而光阻之不以怨光而進專諸俾刺僚而奪之位蓋審僚之不能得志於楚也光為之破楚以伸志故竭力而事之又為其子竭力而報越讐其必不赦越也欲以為奢者

為光而夫差弗信也社將徙矣力諫而死之知亡智也  
能死忠也若子胥者於君臣父子之間可無媿也太史  
公稱吳以子胥謀西破彊楚北滅齊晉南服越人信哉  
獨所以彊吳之蹟備於吳越春秋而其辭不雅馴使子  
胥之志明而才不盡顯以此少泯泯耳或謂子胥之托  
子於鮑氏何居曰彼盖傷奢尚之綫絕而強延之以孝  
托也吾故曰子胥者不悖孔子之道者也

書樂毅傳後

樂毅之破齊凡五載而功不就至以讒間去天下惜之  
獨蘇子瞻謂當其時使昭王尚在反間不得行樂毅終  
亦必敗何者燕之併齊非秦楚三晉之利今以百萬之  
師攻兩城殘寇而數歲不決師老於外此必有乘其虛  
者矣諸侯乘之於內齊擊之於外當此時雖太公穰苴  
不能無敗愚以為蘇子之論事勢審矣獨未能悉樂毅  
也夫樂毅者夏侯玄之所謂仁人也彼非獨仁人也而  
又且智彼其合諸侯而擊齊一戰而大破之臨淄下濬

王走死齊之重器竒珪悉輸之燕中矣如是而不急攻  
莒即墨者以為二城彈丸之地不足為吾害莒南近楚  
急之則必借楚以為我敵即墨東近海死守虜耳急之  
則多殺士卒而未即破而齊故數百年大國也其人彊  
武而習兵且易以亂故必緩而用威德拊循之既久而  
齊人皆為燕矣夫豈直為燕彼且以樂毅真吾主然則  
毅之兵固未嘗五載而盡頓於二城之下也以故新主  
立而南面之間得行騎劫代之勢不得不盡銳以攻即

墨而又以新將故不識地利而恣為暴燕人失毅而離  
齊人失毅而振蓋不待火牛出而燕之敗形成矣且諸  
侯之所以不窺燕者自有說夫以齊舉宋而伐之燕舉  
齊而不伐非獨妬齊而厚燕也謂湣王之不若昭王治  
也謂湣王之待諸侯倨而昭王之待諸侯恭也謂湣之  
舉宋而暴宋不若毅之舉齊而拊齊也且騎劫敗而諸  
侯猶偃然以此知蘇氏所論誤也不然使毅而有可訾  
則惠王必不悔而召之召之不歸而何以封其子高帝

異代主也毅之後何以無功而封孔明三代才也何以  
自比毅而人猶未之許也若蘇子者真所謂以成敗論  
者也

書司馬穰苴孫武傳後

司馬穰苴孫武天下之言兵者歸之穰苴兵法不可見  
所見獨孫子十三篇其精切事理吾以為太公不能過  
也而太史公獨稱穰苴兵法閎廓深遠雖三代征伐未  
能竟其義如其文若爾穰苴其尤勝邪然太史公於穰

苴則僅詳其斬莊賈於孫武僅詳其斬愛姬而已以為  
用兵之道一賞罰盡之矣雖然以穰苴之善用兵而使  
燕晉之師得脫而罷去追擊之僅收所亡境內封地耳  
不能大有所摧敗也景公尊為大司馬而委之政其時  
亦可以有為何不脩桓公之業而廓大之卒見擯於高  
國以死至於吳之彊伍員力耳柏舉之戰雖能乘勝入  
郢而班處其宮使秦師得用其救再合再敗而後歸又  
不能預防夫槩之為內孽安在其為武也太史公又稱



其北威齊晉顯名諸侯恐亦附會之過當其時武必先死矣不然而攜李之敗績會稽之許成舍腹心之越而從事於石田之齊武胡為不諫救也太史公亦云能行之者未必能言能言之者未必能行蓋頗見微指云穰苴之兵法大約威王使臚忌輩增飾之晏子春秋亦一及其拒景公宴遊事亦略可証

書呂不韋黃歇傳後

自古至今以術取富貴秉權勢者無如呂不韋之穢且

卑然亦無有如不韋之巧者也凡不韋之所籌筭皆鑿空至難期而其應若響彼固自天幸亦其術有以攝之至於御倡而知其孕必取三月進之子楚又大期而始生政於理為難信毋亦不韋故為之說而泄之秦皇使知其為真父而長保富貴邪抑亦其客之感恩者故為是以詈秦皇而六國之亡人侈張其事欲使天下之人謂秦先六國而亡也不然不韋不敢言太后復不敢言而大期之子人烏從而知其非嬴出也黃歇之為奸大

類不常而行之於為相之後尤不義第其始之脫太子  
雖若釣竒然甚勇而忠史固稱其博學洽聞觀所上秦  
皇書不下韓非子以一富貴之戀而積慮處事若虺蜮  
然亡身滅家而不覺豈不可悲也哉春申君不當稱四  
公子賤謀貴疎間親與文信侯竝而稱可也

書蔡澤傳後

蔡澤以唐舉一言之激袖手而入秦乘應侯之自危出  
不窮之辯杜其口伏其意安然而據其相位若承蜩然

智者以為蔡澤之用應侯然不知應侯之用蔡澤也夫穰侯者秦太后之懿戚而四十年之信臣也應侯以一亡命扼擊而奪之此非特棄穰侯之瑕其材必有以大勝之者夫應侯相而穰侯日見短則應侯之相日益固應侯之相日益固則穰侯終不振當應侯之為相也竊君以行威福專意以酬恩怨人主非不知之特欲伸其所大欲耳武安僂鄭安平稽見法人主之大欲不盡酬而應侯且無以自解蓋嘗仿皇而左右顧求其人

以託稅駕之地而不可得既而微知有蔡澤者游學于  
諸侯小大甚衆而不遇其困甚矣澤之與應侯又非有  
相知之素也其曷鼻魘顏蹙膝攣非能長富貴者也  
與之語頗明消息盈縮之理而非有捭闔操縱取天下  
之深計者也夫困極則易為德非知素則深見恩不能  
長富貴則無與謀傾人之計筭者明消息盈虛之理則  
必不忍蹈前轍無捭闔操縱之深計則必無以見其長  
而形吾短故幡然而薦之天下皆以應侯能用賢而應

侯之過自是無以聞於昭王者蔡澤而稱邪昭王固賢  
應侯其不稱邪則益以賢應侯謂亡有能及之者自是  
而據金印擁高貲而老死於東第無患矣彼荀卿之於  
黃歇韓非之於李斯一以師一以同學而材皆勝之固  
歇與斯之所畏而不欲用者也宜其困且繫死也

讀黃石公

黃石公素書六篇至為淺顯孔老荀卿之所雅言者豈  
別有不傳之祕以授子房而此則約其凡為可示人者

哉不然當報讐大索之後跪而進履於圯橋與夜半不失約子房已思過半矣何用是素書為也

書項羽傳後

吾少時閱書至夜分而困欲寐輒取項羽傳誦之即灑然醒以為非羽不能發太史公筆非太史公無以寫羽生氣羽之罪其大者在弑義帝坑秦卒二十萬人僇降王子嬰耳其惡不待言然彼皆有以致之義帝亦了了者第不免儒而腐夫一牧羊子耳王於項梁之手見梁

敗而不羽之恤遽奪其軍而又不使之入關其救趙也  
又使之為次將而所聽令者羈旅庸奴之宋義彼其心  
固已怏怏於帝殺宋義而楚卒屬之矣刎王離破章邯  
而諸侯屬之矣破函關而秦屬之矣其目中固已無義  
帝矣猶貌而使人請命帝但委之於籍且猶不能免而  
曰如故約籍能無恨也夫豈獨恨也當疑其與沛公結  
而圖籍義帝擁空名於上欲以承平之君臣而御怏怏  
之悍霸倒授太阿之柄而觸其鋒能不立碎也雖然義



帝者腐而不失其正者也新安之坑子嬰之僂蓋天道也彼諸侯之卒積數世而其首皆納於秦庭凡在者皆秦卒之刃餘也又皆其子孫也幸羽一甘心焉孰不為之揮戈者子嬰之降自降沛公耳非降羽也六王之身有屠而死者有囚而死者有饑而死者夫負芻非羽故君而燕及梁非祖父邪誰能忍之故曰有天道也至楚漢之為訟則羽之負漢者一而漢之負楚者三羽之負漢不王關中而王巴蜀而已當羽入關與沛公兄弟也

又皆楚臣何必拒而不納其負一也鴻門之會不殺而封之巴蜀甫就國而兵東嚮其負二也然猶有可言者至太公甫脫烹俎盟血未乾而反戈尾其後其負三也羽自得罪義帝耳不得罪高祖高祖死何以見羽地下哉余故友宗臣每酒間大呼吾寧不成而為羽不能成而為高祖且謂高祖易與耳余笑曰若言高祖易與則過高祖遇羽而拙故思以拙勝之若固見其拙以為易與耳不然彼章邯黥布豈碌碌者何以取之若寄哉

書蘇子范增論後

蘇子之論范增甚奇而其為書生於事體則甚闇夫卿子冠軍何人也以一言之偶中而懷王拜之為上將軍其智勇未聞也章邯既破項梁而殺之楚人之膽奪矣移兵而渡河以大破趙人趙人之膽奪矣趙舉而秦彊夫以已破之楚膽而當方張之秦勢且皆半菽之飢腹而冰霜不完之指唯有解甲而逆潰耳義送子相齊蓋欲以為遁穴而僥倖於目前之未戰乃佯為大言以壓

項籍籍不殺宋義趙必下楚必潰楚之潰在呼吸之間而無他術可以解為籍計者何以不殺義也增於此時去籍則秦追僂亡楚之末將而族之必也籍勝則恨增以為宋義之黨而先去以為三軍之望族之亦必也即兩俱免族而當叛臣僨將之名為增計者何以去也夫增奇策士也豈惟不去而已當與籍謀而殺義不然何殺義之後事事日取增計而尊之為亞父也然則增不當去乎曰有坑秦卒二十萬人失仁失仁法不足以取

天下一當諫也違義帝之約而王漢王楚失信失信法  
不足以取天下二當諫也弑義帝失義失義法不足以  
取天下三當諫也諫不從則去之去之而無忿懷之跡  
以完其身可耳若殺卿子冠軍何以去也

讀陸子

陸賈縱橫者流耳而所撰十二篇皆淺顯無甚倣儻之  
見而亦不詭於道或謂非賈書不然也使後人偽為之  
則必詭其理雄其辭而張皇其事矣賈固時時近儒者

高帝不讀書故驟而歎其雄博其意不在馬上治故徐而益有入焉彼其他所以拊尉佗和平勃皆正論也是故幸以富壽怡樂終而不為食其之烹蒯徹之闕也說固有道矣

讀書後卷一

欽定四庫全書

讀書後卷二

明 王世貞 撰

讀淮南子

史稱淮南子撰內書二十一篇外書甚衆又有中篇八卷言神僊黃白之術亦二十餘萬言今其存者內篇而已而又亡其三篇讀之知其非一手一事也其理出於文子莊子列子其辭出於呂氏春秋玉杯繁露慎子鄧

析山海圖經爾雅其人則左吳蘇飛李尚田雷被伍被之徒各取其長而未及衷以故多錯綜重複不受整束而淮南王之材甚高其筆甚勁是以能成一家言蓋自先秦以後之文未有過淮南子者也其書為劉向所纂集中篇之亡當亦自劉向為更生時故當得其枕中之鴻寶而作黃金不成幾陷大辟父得惡諡是以諱而去之夫淮南王好神僊身坐死而遺禍及更生亦幸而存哉或曰淮南王真僊去不死者也漢以法誅王求王不



得而諱之

讀賈子

賈子上下二篇其上篇皆誦說時務其事與辭皆載治安策中不知其書成自擇而上之邪抑以其書上之而為班固之所裁節邪下篇則無論德政援據古昔然論政則有餘論德則弗足矣人言文帝不能用賈生者妄言賈生不能用文帝者亦妄梁大國也懷王上愛子也以賈生居之蓋非久而入為公卿矣生死而文帝次第

行其言孰謂賈生不用哉夫賈生用而不相陸贄相而不用則其君有昏詰也

書齊悼惠王世家後一

齊悼惠王肥者高祖之庶長子也哀王襄者悼惠王之元嫡也文帝者高祖之第四庶子也惠帝崩有二子皆疑當廢哀王立而考惠帝於事正於序宜呂氏歿諸呂謀危漢哀王發兵入討之為外主而諸弟朱虛侯章為內主奪產祿之鬼而誅之功最大兵發而繆召平詐取

瑯琊下濟南才至高諸大臣絳灌曲逆畏哀王之武而  
貪文帝之仁弱舍此而立彼僅還所奪之郡一侯其舅  
駟鈞以小慰觖望而已哀王以是歲薨而文帝至為令  
主比德三代傳世二十寧非天哉二年王章王興居然  
皆背割梁趙盟皆析齊之壤而封之以失職怏怏章死  
而興居叛誅十二年志在王濟北十六年辟光王濟南  
賢王菑川邛王膠西雄渠王膠東皆悼惠子也吳楚反  
其不從反者僅一齊地而已雖王之尚未愜於志也絳

侯下獄駟鈞享國薄昭誅死外家之說胡據哉

書齊悼惠王世家後二

吾嘗謂高帝有材子孫四人文帝亡論矣如意少而當  
帝心以為類我不幸夭耳必有以類高帝者哀王襄景  
王章皆椒宮少年子也不畏高后之餘威不虞諸呂之  
彊力哀王鳩東海之烏合突起而西向章以北軍千餘  
之卒逐呂產而殺之悉殲其族黨非有膽勇謀斷誰能  
勝焉絳侯之與諸大臣共議謂駟鈞虎而冠恐以外家

握權而亂天下而置之非本心也其意實患哀王之果  
銳且其舉兵時名以誅諸呂則必以薄諸呂之共事者  
慮他日之見誅而貪代王之仁弱建策立之夫舍有功  
之齊而推不意之代王王必德我嗟乎庸詎知絳侯廷  
尉之獄不在哀王而在文帝駟鈞老於徹侯而薄昭以  
暴橫戮也抑不特此博陸侯光之立昌邑王有廣陵在  
也不聞昌邑之賢於廣陵光固難廣陵而易昌邑也昌  
邑廢而拔宣帝於民間而帝之天下之德光孰有過於

宣帝者然而族光者宣帝也徐羨之等之廢廢帝也而先以法除義真為義真言敏銳故預廢焉以為文帝地不知誅羨之等者又文帝也勃之辱光之族羨之等之誅雖必不盡出於公然而諸臣者所樹皆得人以成一代之治所以報之者亦少恩哉

書賈誼傳及蘇軾所著論後

余少讀蘇軾所為賈誼論謂非漢文不能用賈生乃賈生之不能用漢文耳而中有云絳侯親握天子璽而授

之文帝灌嬰連兵數十萬以決劉呂之雌雄又皆高帝  
之舊此其君臣相得之分豈特父子骨肉手足哉賈生  
洛陽之少年欲使其一朝之間盡棄其舊而謀其新亦  
已難矣為賈生者上得其君下得其大臣如絳灌之屬  
優游浸漬而深交之使天子不疑大臣不忌然後舉天  
下而惟吾之所欲為不過十年可以得志安有立談之  
間而遽為人痛哭哉觀其過湘為賦以弔屈原悲鬱憤  
悶超然有遠舉之志其後卒以自傷哭泣至於天絕是

亦不善處窮者夫謀之一不見用安知終不獲用也不  
知默默以待其變而自殘至此吾未嘗不伏蘇氏論人  
之當揆事之長而歎賈生之無辭以自解其後得班史  
之所著傳而讀之然後知蘇氏之工於揆事急於持論  
而不盡悉故實也夫賈生之始建議改正朔易服色制  
官名興禮樂固非絳灌之所喜而實亦非絳灌所深惡  
也其所深惡者在遣功臣列侯就國而已故假以紛更  
之罪而譖之帝帝亦因其譖而姑出誼以慰安之且欲



老其材而後用之耳非果於棄誼也何以知其然也諸  
王太傅在王相下與郡守等自大中大夫而出不為左遷  
特以長沙卑濕且一異姓貧弱之王其跡似棄耳亡何  
而召見宣室自以為弗如而徙傳梁梁大國也梁王愛  
子也誼不死即入而九卿矣故曰帝非果於棄誼也誼  
亦非悲鬱侘傺而至死者何以知其然也弔屈之辭雖  
若以自擬而實譏其不能自引而高逝賦鵬之辭雖若  
以自弔而實歸之知命而不憂其所上治安策有可為

痛哭長太息者蓋在召對宣室與傅梁之後也所謂立  
談之間而遽為人痛哭者豈實錄哉且賈生之自傷在  
為傅無狀且哭泣以悲梁王之墮馬而死非以不用也  
壽夭有命生之天又焉知其非命之盡而歸之自傷又  
歸之不用寧非冤哉史既稱絳灌之惡之而絳侯之就  
國以一言告訐而遽繫誼以待大臣之禮風之而上遂  
幡然改誼不絳侯之怨是脩而脩國體抑何厚也劉向  
所以深惜之而軾不之知也夫誼死而文帝次第用其

言誼雖天不為不用也吾固曰蘇氏之工於揆事急於持論而不盡悉故實者此也

書司馬相如傳後

司馬長卿不差其淫奔之卓女而自紀其事使史家傳之以穢後人其文辭之美麗固不能相救而子長復謂其與卓氏婚饒於財故其仕宦未嘗肯與公卿國家之事嘗稱病間居不慕官爵似未盡得其意者長卿固智人也方其一出使而太守郊迎縣令負弩婦翁諛之易

恥以為榮而又成闢土之功名於願已滿矣逆知武帝之易封而亦易侈故避而吏隱於文園擁國色發揮文詞以自娛樂不亦泰哉彼其材已試於西南夷武帝固心器之矣使小與公卿國家之事而取通侯之印擁公卿之組固不難其與主父吾丘買臣嚴助輩駢首於東市亦易也王子猷蓋知之是故不取井丹之高潔而取長卿之玩世者所謂智也

書霍光傳後

當武帝之末海內虛耗盜賊羣起強藩壯王睥睨於外而博陸宣成侯以宿衛之庶臣無三事九伐之素寄擁八歲之幼主而御宸極中外之孽不作公私之庾漸充能使其君晏然而信之一日而僂貴主覆悍社收椒宮之祖父與副相之重駢首就屠而亡後言廢一君立一君若承蜩而亡它變此非有沈毅獨斷之略周詳萬全之慮不能也其所以胎禍者驟乘之芒刺而罪至於不可解者宮掖之醢毒而要之有天道焉武帝雄鷙好殺

光固已心儀之少府徐仁廷尉王平之議獄不當而已  
胡至死也昌邑王之淫亂不足以當宗社之寄即有之  
其從官坐不諫正削秩禁錮可耳胡至二百餘人悉棄  
市也王莽之子妄言以莽故寬之可也胡至使父酖其  
子田延年之決於廢立功非小胡忍以詐取平直事必  
置之自盡也凡光所持三尺寧過母不及是以宣帝一  
時闕三字孥慘而無遺亂寧非天也然帝能誅光之子  
孫而不能盡削光之忠猶像之麟閣以寓其思侯封之

續及於旁盾中牢之祀迄於東京則光固有以自剖別哉

書淮南厲王傳後

淮南厲王驕恣不奉法其所論獄若為黃屋擅拜丞相  
爵關內侯收聚諸侯王人亡命賊殺無罪人法皆可以  
死而坐以謀反則未也以文帝時天下若金甌而又最  
稱理即病狂喪心者亦何敢以蕞爾彈丸之地而與之  
抗且夫男子七十人輦車四十乘反當何所為也使閩  
越匈奴以市明珠良馬或有之夫越數千里之外徼荒

服之夷虜而為期會欲與其人相應合世固無是理也  
當是時天下之人實知之以故文帝之賢厲王之暴而  
尺布斗粟之謠所由起不然而文帝亦何至終愧悔耶  
其子安之反則有之蓋憤父之死矜己之才而窺武帝  
之有釁也亦可謂不智矣雖然王安之謀反固也然而  
未成反也學仙者流則謂王與八公者習不死術而流  
言聞於武帝帝使按之即與八公俱上昇帝恐其為天  
下惑而別起間如後之戾太子子興事而稱其自殺以



苟完獄耳以故心豔其事竭天下之財力求為神仙而  
不可得劉向去安時無幾得枕中之遺籍而寶習之此  
寧非明徵哉獨所謂八公者有左吳伍被雷被夫左吳  
首禍者也伍被首反者也雷被告變者也雷被用而左  
吳伍被誅意八公自有人不然吾未見三子之能仙去  
也班史不當與伍被別作傳當附之安傳蒯通亦不當  
別作傳當附之韓信傳江充當附之戾太子傳息夫躬  
當附之董賢傳嗚呼孰謂班史有定識哉

書張安世傳後

張湯之於安世父子也其才智強記同然而湯刻而愴  
安世慎而共湯膽大安世小若是乎薰蕕也然而有不  
可曉者湯廉而安世貪也劉向之於歆父子也其才氣  
學問同然向為劉氏而攻王氏歆為王氏而削劉氏其  
忠逆異也他若石碯之忠而厚逆也賈逵之忠而充逆  
也桓彝之忠而溫逆也黃權之降敵而崇死敵也沈充  
之逆而勁忠也李懷光之逆而權忠也所謂父不得而

子者寧獨堯之丹朱瞽叟之舜舜之商均鯀之禹也雖然子可以有不賢父父不可以有不賢子則子尤重哉

書漢武帝時功臣侯年表後

世稱漢武帝不愛通侯之賞以鼓舞世之趣功名者故能破匈奴滅朝鮮舉甌閩卷南越闢滇蜀而增益天下之半然所謂封侯者殊不可曉而所謂罰者亦未盡當也今夫丞相天子所與共理天下者也固當以賢舉藉以不侯而不丞相固不可以丞相不功而與之侯尤不

可也孰若俟其相道得而後侯之乎乃至遂舉之以為  
例使田千秋以一言而相又緣相而得侯何也卜式請  
以父子擊南越賞之可也而與之關內侯不可也孰若  
賞而聽之往功成而後侯之乎樂大一妄庸人耳而遽  
以之為上將軍而侯之以五千戶之封孰若俟其驗而  
人主之壽益而富貴之乎大將軍青之破右賢王得其  
將校人畜至數萬計益封可也而益之至八千七百戶  
其三子皆襁褓而悉封侯不已濫乎其最後帥師圍單

于斬首鹵級萬九千使其王叛而稱其主號而不益封  
乃至將校俱不得侯何也戾太子自經於泉鳩里之舍  
男子張富昌踰戶而入令史李壽趨抱解之太子而  
生侯之可也不生賞之可也胡至聯翩而侯邦題之邑  
乎上官桀之破郁成得其王於康居而使四騎縛送之  
貳師所恐其有失也騎士趙弟拔劍斬之無可賞也桀  
不過轉一官為少府而弟胡以侯新時乎至於罰之不  
中節尤有可言者荀彘之縛路博德以爭功相疾棄市

然樓船之始敗於朝鮮既以左將軍勝而後合兵又陰與敵和非無罪者也公孫遂之往天子知二將之異使正之且許有便宜得以從事遂與左將軍謀而縛樓船非矯制也左將軍誅遂亦可誅乎左將軍即可誅朝鮮平矣獨不可以功贖乎張富昌李壽以太子侯田千秋以白太子冤侯而太子無罪之嫡尚繫之獄何也第所謂罰亦就一侯事舉而及之耳其他死於酷吏之手而決於一時之怒不可屈指數也嗟乎武帝以人主之

威天下之力驅之誘之幸而成功名於將亡之敵孰謂其能鼓舞哉

書班史酷吏傳後

太史公敘酷吏中有張湯杜周以湯逢武帝之忤而道以深文故所以描寫其情狀不遺力即小廉薦士不沒之然不以貴也班氏之稱湯謂能辨當否國家賴其便又云湯周子孫貴盛故別傳噫何足訓哉太史公之誅湯誅意也吾獨怪夫郅都骨鯁廉信士也為濟南守滅

閻氏首惡餘皆股栗而已不如義縱王溫舒之妄殺也  
為中尉行法不避貴戚列侯宗室側目而視而已又不  
若溫舒之諂事有勢姦如山不可犯也為鴈門守匈奴  
不敢犯至為偶人象都令騎馳射之莫能中都固赳赳  
干城也其罪獨有臨江王誼中尉府對簿欲得刀筆為  
書謝上而禁弗予意以為上親子吾不敢廢法又如是  
而已非有所迎徇深文燬質也身之不免而被以酷名  
寃矣田延年增車牛直剋貲三十萬罪固有之然其為



河東選拔尹翁歸等為爪牙誅鋤豪強亦如是而已翁  
歸能臣也必不為濫刑延年於廢立有大功何至等之  
酷吏哉郅都死矣寃於太史公田延年死矣復寃於班  
氏吾以為二史亦深文者

書涼州三明傳後

余讀涼州三明傳若威明然明皆廉節好讓有將帥材  
著績中外而皆不免為名使威明尤好之甚至自疏為  
黨人而上不之問夫明哲保身者固若是乎大將軍武

太傅蕃之有朝望志除宦官誰不知之豈有所徵而不  
知本謀者然明亦不過於生死是非之際一時不能決  
擇耳既成而始悔辭爵不拜追理武蕃之寃表薦李膺  
王暢以與閹宦抗雖曰晚矣猶知有不遠復者紀明真  
將材也當西羌之為梗鄧騭挾元舅之尊秉大將鉞以  
天下全力與之角而不勝幾棄涼州賴以孤軍轉戰十  
餘年長矛勁弩奮其膂力敵為之盡非其材之過人疇  
克如是晚節與中官比冀以全身而竟身殉之良可歎

也陽球為酷吏非有腹心之素一疏而誅中貴人父子  
立蹴上台奪帝所甚愛而除之漢事故不可測哉

書揚雄傳後

自孟子歿而有荀卿氏荀卿歿三百餘年而有揚雄氏  
中間若董仲舒之正毛伏以下之專於其經術若有補  
焉而未有立言以維持道統者揚雄氏始準周易而為  
太玄準魯論而為法言法言之所結撰要在於尊周孔  
辨術經治一時已稱述之至昌黎氏而尊涑水氏而信

涑水氏之於孟子不能信而獨信揚雄氏揚雄氏之出處其先亦未有訾之者獨不能不有微恨於劇秦美新而紫陽氏之著通鑑綱目直書之曰莽大夫揚雄死蓋舉市國之褚淵厯姓之馮道所不加者而加之於是雄之名遂忍人之齒頰而其身毋所容於聖門之藩籬矣及考其傳而推之則事不必盡然而情亦有大可原者當雄之游京師而給事黃門也成帝之世與王莽劉歆竝哀帝之初復與董賢竝莽賢皆至三公負責勢所薦

引立擢而雄三世不徙官及莽篡漢劉歆輩皆用符命  
頌功德而雄復不侯以耆老久次轉大夫則其不附王  
莽可知然所以濡滯而不去者以去則莽必恨之恨之  
則必追而戮之即不恨必且召而有龔勝之事雄見夫  
莽雖奸然自唐虞以後所創有而未嘗稱干戈以翦劉  
氏之社稷而身又不當扞圉之任如是而死孔門之所  
不載而微箕之懿戚尚且受封於周而謂之仁是以浮  
沈待盡以存五世一綫之息耳至於劇秦美新故不見

本傳即有之亦投閣之後不得已冀以瓦全且所劇者秦耳而不及漢所美之新美於秦耳不美於漢也不然涑水氏能斥馮道訛介甫而獨雄是恕乎哉紫陽氏之深意吾固已知之即文中子之賢尚議其僭攻其瑕而宋之統遂接孟子矣何況區區一雄哉

書鄧禹傳後

鄧仲華有遠識蕭張流也然而非大將材也其心寄雖已篤而齒尚早名位尚輕戰事尚未練一旦中分六師

之半崇以三公之位而委之關中之大敵竊以為光武  
誤也斯道也高祖蓋深知之故根本付之鄼侯謀畫寄  
之良平而大將之印獨舒徐焉必待淮陰而後有所歸  
彼於料已料敵審也夫史稱光武諭河西其將吏皆臣  
服以為天子明見萬里外雖然此一事耳吾以為明不  
如高祖高祖以數萬衆授一釣者佐以羈旅之降王而  
不之制裂地以予未輸膽之大盜而不之惜得一叛王  
以已之供供焉而不之疑若光武者猜龐萌抑隗囂薄

彭寵而致其叛於呼吸成敗之際不為明且遠也我高皇之善任也實與漢高竝是故韓公誠意跡不蹈行陣而中山開平歲不絕受脤之託彼皆各當其用也然則善將將者毋若漢高之與我高皇也

書黨錮傳後

黨錮中當以李元禮為第一陳仲舉次之竇游平擁后父之尊迎立嗣主此不過人臣之常節耳而身改大國一子二從皆封侯握兵縱遂能聲宦官罪而盡誅之何



以服其心使無語邪元禮文武材也惜不善用之耳史  
稱其蘊義生風以鼓動流俗激素行以恥威權立廉尚  
以恥貴勢此三者誠有之夫豈惟非明哲保身之道即  
所以樹臣節而全國體者亦未當也林宗雖曰遜言危  
行終享時晦亦是由早逝耳使得及陳竇之變恐亦不  
能免也諸君猶之可也張元節岑公孝不勝其剛腸肥  
腦陷府主於大辟而身並亡命元節之所株累為之捐  
城委爵破族屠身至數十百所嗟夫是不可為范孟博

乎縱不復愧諸死友獨不愧翟超成瑨乎哉且也賢者不必皆黨錮黨錮亦不必皆賢劉景升不臣張邈胡母班不擇比胡以終也蓋十餘年而欲挾匹夫之持論與朝宁相抗者吾不知所終矣

書蘇子瞻諸葛亮論後

蘇子瞻以仁義詐力雜用而取天下為孔明之所以失而謂劉表之喪昭烈在荊州孔明欲襲而取其孤昭烈不忍其後劉璋以好逆之至蜀不數月扼其吭拊其背

而奪之國其與曹操異者幾希矣曹劉之不敵天下之  
所知也言兵不若曹操之強言地不若曹操之廣言戰  
不若曹操之能而有以一勝之者區區之忠信也孔明  
遷劉璋既已失天下義士之望乃始治兵振旅為仁義  
之師東向長驅而欲天下響應難矣凡蘇子之持論甚  
至而事甚美雖然吾以為蘇子書生也不識理勢且又  
不讀書不攷其時事夫荊州用武之地孔明之初見昭  
烈已言之昭烈不得荊州不可以抗曹氏曹氏不得荊

州不可以滅昭烈而扼江左之上游然則曹氏未嘗一日而忘荊州與昭烈也昭烈以左將軍領豫州牧劉表僅鎮南將軍領荊州牧其位在表上特以羈旅相依粗具契誼非有君臣之分也表天子之一刺史非世守之國也表兄也昭烈弟也兄終弟及非過也取之固可否則取之而表琦為刺史而身輔之以拒曹氏亦可昭烈之不忍固仁也而孔明之計非不義也當陽之敗幸而夏口尚有歸又幸而孫權不與曹氏合耳不然昭烈之

首已懸之許昌矣吾固曰蘇子不曉理勢也昭烈之入蜀劉璋逆之欲破張魯孔明不在行也其即會而欲掩劉璋者龐統法正也而昭烈不忍也既劉璋微覺之而不給軍食所至以兵守關隘昭烈欲歸荊州而跋尾之不能且立槁矣劉璋馬子也焉不卹宗室之阽危而據險自固朝貢俱廢又擅造郊祀乘輿法物非叛臣而何璋之立未請命也曹氏之拜官曹氏與國而已仗義以討之夫誰曰不宜吾故曰蘇子不讀書又不攷其時事

蘇子又曰曹操既死子丕代立曹操之臨終召丕而囑之植未嘗不以譚尚為戒也而丕與植相殘如此其父子兄弟且為寇讐而況能以得天下心哉此有可間之勢不過捐數十萬金使其大臣骨肉內自相殘然後舉兵而伐之此高祖所以滅項籍也愚以為蘇子蓋不特書生而已一妄庸人嚙語也夫自古捐金而間者豈惟漢高秦始之於趙魏亦有之矣夫秦之間信陵李牧其勢固已如太山壓一卵而當時信使游客車相錯而無

禁高帝之與項籍兩軍相拒不過數十里信使游客亦  
不絕而後皆得以行金而為間今魏蜀之使不通而關  
譏若戟門誰為之行金兩國之臣非故交誰為之通間  
且夫丕嗣之三月而篡漢篡之踰月而召植而囚之若  
孤豚又其大臣皆曹氏之心腹也夫間必自隙入所謂  
隙者安在也夫守義而責其所當得之吳蜀廢義而言  
其必可乘之間抑何前後翻覆也吾故曰蘇子者一妄  
庸人嚙語也

書諸葛亮等傳後

孔明與子瑜為親昆季而公休則從弟也孔明為漢丞相秉國鈞子瑜至大將軍亦參預吳大政而公休仕魏至司空各以身分事三國而不相猜又皆三公也又皆自致功名封徹侯而公休獨不終即世說所載蜀得其龍吳得其虎魏得其狗而公休之望實俱下下矣第考其行事恐公休亦不分為狗也在洛下與夏侯太初齊名為吏部郎中丞尚書皆有望實出鎮壽春使一方肅



戰及敗死而麾下數百人無一降敵者且曰為諸葛公  
死不恨此豈常人所能及哉抑不但公休而已也即子  
瑜之子元遜其材亦孔明流亞也識度故不及耳元遜  
事事效孔明孔明相幼主則亦相幼主孔明伐魏則亦  
伐魏孔明斬馬謖則亦斬朱異孔明責李嚴則亦責李  
默循跡而效之此其所以愈速禍也且夫山越之收何  
下於孟獲之禽而淮南之勝亦有光於祁山之捷最後  
頓兵堅城以疫退舍雖損失亦不至斜谷之敗也其所

以人情相徑庭後事遂霄壤者孔明密元遜疎孔明靜  
元遜躁孔明遂而順元遜遂而倨孔明嚴而仁元遜嚴  
而刻耳嗟乎孔明之忠漢也與子瑜之忠吳也思遠之  
繼孔明而死忠也尚之死孝也壽知之亦能言之公休  
之忠魏也壽不知之矣後世尚能知之而元遜之忠吳  
也後世亦不知嗚呼壽不唯不知也而列公休於鍾會  
列元遜於孫峻孫琳不亦冤哉

尋元遜之初輔政其聲望赫然每出百姓延頸思見

其貌而淮南之役覆魏之全師而取之中原大震其  
後雖不利亦不至掩前勝也何三月之間而頓失人  
心以至覆宗慘身為世口實乃爾蓋孫峻之徒畏其  
嚴忌其盛而搆之少主未必皆實錄也嗚呼人固不  
可以成敗論哉元遜滅於吳而仲弟喬有後於蜀公  
休滅於魏而少子覲有後於吳其子復顯於晉思遠  
與子尚俱徇節而季京仕晉為郎天之巧於全賢者  
後若此

書馬謖傳後

馬謖之所譚攻心為上攻城為下心戰為上兵戰為下  
雖太公孫武之為法孰能過之然張郃一騎將耳以翼  
德之寡謀提之而有餘謖用孔明之成師一戰而沮壞  
不復振者此心戰之論豎儒之所傾聽而街亭之所繇  
敗也孔明未能盡離儒者是以輕信謖而大用之其後  
誅謖是也習鑿齒之論孔明得其誅而不得其所以誅  
也魏延吳懿可用而不用其不平久矣苟惜謖不誅何

以使之服自是而更有失律者何以獨行法獨行法則  
衆議紛然而蝟起不行法則軍氣瓦解而不振謬清談  
士也寧可以得臣比乎荀林父赦而晉霸得臣誅而不  
害楚彊然則楚亦未可非也載考向朗傳隨亮漢中朗  
素與馬謖善謖逃亡朗知情不舉亮恨之免官還成都  
然則謖且逃矣不即歸死司敗捕而後得之不誅何待

書陳思王植傳後

陳思王於文帝同母弟也文帝即位之二年即風監國

謁者論劾其罪名而欲誅之以太后之救而幸免然亦  
瀕死者數矣蓋以武帝之世有奪嫡之謀而未遂故也  
而王仲淹乃曰思王三以天下讓夫豈其情哉與楊脩  
善則脩為之擬答與丁儀丁廙善則儀廙為之請嗣雖  
有百口無以自解然丕方矯情自飾而植乃任性以行  
乘車馳道中與伐吳醉不能受命此雖非臣子之節然  
觀過知仁亦可以見思王之無意奪嫡而貪功名者如  
三子輩成之也仲淹殆得其微矣雖然思王之失職成

之者三子也而啟之者武帝也攷之漢建安十五年司徒趙溫辟丕茂才而坐溫選舉不以實免官十六年始拜五官中郎將而植已封平原侯十九年徙封臨淄侯是時同母之兄任城尚未侯也二十一年而任城始侯鄢陵則思王已加食邑至萬戶又時時對人稱說其才而欲立之豈所以安思王哉不特一思王也鄧哀王沖僅十三而亦欲立之及其亡也乃謂文帝曰此我之不幸而汝曹之幸也噫是何言也厥後任城以彊勇毒思

王削而移徙藩國若傳舍幽憂疎隔亡異囚竄至使文帝後謂臣下家兄孝廉自其分也若使蒼舒在我亦無天下蒼舒者冲小名也嗚呼孰謂非武帝啟之哉如意不死呂氏而死漢高攸不斥晉武而斥晉文定陶豫章幸而免耳然亦危矣按魏略又謂太祖疾甚驛召任城至洛而已殂任城乃謂臨淄侯曰先王召我者欲立汝也臨淄侯曰不可不見袁氏兄弟乎然則斯言也王仲淹之所以稱讓任城之所以毒而思王之所以終免也



讀徐幹中論

徐偉長於七子中不甚錚錚其所著玄猿漏卮扇橘諸賦見推於曹子桓者今多不之見而獨中論十一篇即子桓所稱成一家言者東漢之季其文氣最為緩弱不流暢然頗樸而近於理如幹中論是也視學已自近裏法象猶足裊身然此二者非孟德之所急考偽一章所條為名之弊凡數總而斥之曰盜夫斥之曰盜誠惡之也然而孟德倡之也孟德倡之而偉長斥之子桓以為

稱而不之覺嗚呼其真不之覺邪將不滿於孟德邪

書陸遜父子及機雲傳後

陸伯言一少年書生受脤而據諸將之上揮塵揚策破天下之所憚服以為英雄如昭烈者若拉枯朽然後挫北兵奠南服國無亡鏃算不遺籌其孔明之流亞歟而物議稍不及者當由經理內政收採羣情有所未足耳孫仲謀能信之於未試之初而疑之於既成之後非伯言之有勤怠也仲謀有勤怠也幼節德不及羊叔子而

才微勝之然能使孫皓緩亡者皆其力哉夫以權之智而不能容伯言以皓之昏而能容幼節者天也士衡縱橫六寸之管而假七尺之壯軀叨三世之將名不能逆自韜晦擁旄非分舉宗覆滅不亦哀哉道家之忌士衡固已知之而又犯之且伯言前後決勝頗以陰謀而幼節之平西陵坑僂無噍類又寧盡天也士龍前後為守令皆著循吏聲然以區區小仁而欲為顛覆之木難矣

書羊祜傳後

史之所以美羊叔子者至矣其先識不伐則見於曹爽之敗有功不居則見於國邑之辭日與吳競而敵不恨恩施於敵而上不疑餉歲積而民不告困歿有遺思而久不至忘夫豈直古之遺愛已哉至於宏覽淵識冲度和襟郭遐周顏子之目殆不虛矣雖然吾以為叔子智者也得老氏之精而用之者也若於仁則吾斯之未敢信何以知其然也夫曰慈曰儉曰不敢為天下先曰抗兵相加哀者勝矣曰功成名遂身退天下之道夫此數

者皆叔子之所饒有也得俘兒而不殺縛敵將而放歸  
此非慈乎輕裘緩帶鈴閣之下不過數人此非儉乎一  
聞開府踧踖不居而讓之三光祿此非不敢先乎追斬  
敵將憐其死節而厚殯殮之此非哀者勝乎大業垂就  
而預為容棺之墟以待此非功成名遂身退者乎雖叔  
子為德於吳厚矣然未嘗一日而忘滅吳則又老氏之  
所謂將欲取之必故與之者也且夫曹爽擣而魏之族  
也其志猶有魏也司馬氏材而魏之賊也其志已無魏

矣叔子魏臣也何以策爽之必敗而遠之策昭之必取而就之陳留王之立也何以不願為侍臣而求外補吏也未幾而何以安為相國從事中郎掌機密也賈充小人也何以出關中而密疏留之蓋策賈充之必不成出也凡此皆所謂智也夫仁人者明其道不計其功而吾何敢信焉雖然自魏晉之際未有如叔子之賢者也以司馬氏腹心叔子最賢而尚無後張華次賢則侈而無後然二子尚猶成其名也裴秀次賢則子願侈而無後

王沈不忠則子浚亦以不忠僂而又無後賈充不忠無後而族盡滅何曾稍疎則至孫而滅亦無後嗚呼司馬之德若是而能久有晉哉

書阮籍傳後

吾嘗讀晉書阮籍傳謂其喜怒不形於色發言玄遠口不臧否人物而又云能為青白眼見禮俗之士以白眼對之由是見疾如讐以為立言者之自相牴牾而不知其皆實錄也謂籍以酒全其天非也籍乃以巧全其天

者也籍故逆知司馬氏之必篡魏而不欲為之臣與荀  
勗賈充輩同列而自顧其瓌傑之貌宏麗之文磊落不  
羈之才欲掩之而不可得司馬氏必知之而且欲用之  
夫司馬氏欲用之而不為之用必死為之用而不預其  
謀亦必死死則又不足以成名故托而逃之醉一醉而  
連縣至六十日彼豈其情也哉凡其卧酒家乞步兵厨  
甚至於母死而舉二斗酒食一蒸豚自遠於名教之外  
使何曾輩疾而惡諸司馬氏皆以為不死地也曾言而



不用故無他其言用不過廢徙而已不死也然猶慮司馬氏之識之故其乞相東平草勸受九錫章示若為之用者特不勝好酒之一念耳使司馬氏狎而愛之愛而舍之以終保牖下者巧也昔人謂澄公以石虎為海鷗鳥若籍者殆以司馬氏為海鷗鳥也嵇康略知之矣而未能究故雖稱土木形骸不事脩飾而時露其鋒距於土木之表此何時也而其與山濤書菲薄湯武之放伐鍾會何人也造康而箕踞待之不為禮且問以何所聞

而來何所見而去夫會之來叩籍以時事也亦其見康意也籍醉而不能答會亦當恨之特其所以恨籍者淺而恨康者深也知二子者莫孫登若登故報籍以長嘯而報康以苦辭康下獄而後悔晚矣人不知乃以勸進九錫章短籍按進章不見籍傳而見文紀末謂大魏之德光於唐虞明公盛勲超於桓文然後游滄海而謝支伯登箕山而揖許由然則風之終讓也非勸進也不然以炎之為壻豈不足為呂公王莽者而至飲一醉六

十日而不之許也

書周顗傳後


周伯仁吾所不解過江以後若使追喪亂之艱難此身之非有或散髮巖阿或栖遲冗列用拙挫名以酒蔽身可也既居九列叅密議而縱飲沉湎狂僻廢禮且夫密疏申救始興而不言德固若長者夫以元老故交哀呼求救了不之盼而顧左右云今年殺諸賊奴取金印如斗大繫肘寧能不使之飲恨橫發邪伯仁之死即始興

救之久亦必殺但小緩耳伯仁死始興不能無罪檢表而泣以情語諸子猶庶幾哉

書周處傳後

周子隱感奮時譏折節砥礪文武果亮為時所儀抗忤權威委命疆圉若無可憾者吾猶謂其為晉而死六陌不若為吳而死無難督也亡國之戚雖足以杜王渾口而吳魏均滅要之百步五十步耳宣佩之勛猶不在子隱下而晚節不固獨彥和首亂而存宣季從亂而旌晉

於是乎失刑賞哉議者謂子隱之子孫多愧其先烈吾獨以為之兆也若筵者皎然為君子且有光矣



讀書後卷二